

四庫全書

子部

欽定四庫全書

子部

唐開元占經卷八十八

九

詳校官中書_臣李杲

靈臺郎_臣倪廷梅覆勘

總校官編修_臣王煦緒

校對官中書_臣王慶長

謄錄監生_臣錢雋選

欽定四庫全書

唐開元占經卷八十八

唐

瞿曇悉達撰

彗星占

候彗字法一

黃帝占曰候彗星之法當以五寅之日視瓮水中見兩
方氣在日旁則彗將出矣其與北斗之星各有所主乃
視氣之五色相象而定之其彗星之出以寅日見日旁

有青方氣在日旁此歲星之精將欲為彗以寅日見赤
方氣在日旁此熒惑之精將為彗各以五色氣候之是
則五星將欲為彗之變先見其氣後見其彗彗星見而
長天子死五都亡賤人昌無道之君受其殃期不出三
年石氏曰候彗灾應之法各以十二辰所出之地各
屬相連衝破之下當有兵誅假令彗星出室壁而依戌
地奎本魯分室壁衝分衝於寅尾箕燕分破於辰角亢
鄭分明魯有兵誅於此國他皆倣此 巫咸曰歲星行

東行南六十日不還以初去日六月彗星出東北六十
日不還以初去日六月梣星出西北六十日不還以初出日六月攬
星出西南六十日不還以初去日六月搶星出乍東乍
西乍南乍北天狗出必有兵革 巫咸曰辰星出四季
彗星出 郝萌曰太白與日共合同舍七十日生彗星
郝萌曰熒惑守箕三月彗星出 荊州占曰歲星逆
行過度宿者則生彗星一曰天梣二曰天槍三曰天攬
四曰第星此四者皆為彗 陳卓占曰熒惑守心期三

十日彗星出 陳卓曰填星守熒惑期三十日彗星出
齊伯曰填星出入以舍斗五十日不下彗星出

彗字名狀占二

春秋文耀鉤曰辰星散為茀說苑曰攬搶彗梃皆五星
盈縮之所生 荊州占曰彗星者君臣失政濁亂三
光五逆錯變氣之所生也 呂氏通紀曰彗星者天地之
之旗也 淮南鴻列曰彗星者天之忌也 春秋演孔
圖曰海精死彗星出 春秋考異郵曰鯨魚死彗星合

淮南子曰彗星出宋均曰春秋考異郵曰臣之恣地動是將有兵相煞之祥也

星孛 京房曰君為禍則彗星出 鄭玄曰彗星主掃除

石氏曰凡彗星有四名一名孛星二名拂星三名掃星四名彗星其狀不同為殃如一其出不過三月必有破國亂君伏死其辜餘殃不盡當為飢旱疾疫之灾其星日行一尺二十日而入此彗星之行也 文穎注漢

書曰孛彗長三星其占略同然其形象小異孛芒短其光四出蓬蓬孛孛也彗其光芒長參參如掃彗長星其

光芒有一直指或竟天或十丈或一二丈無常也大法

孛彗星多為除舊布新改易君上亦為火災長星多為

兵革

史記淮南王傳曰建元六年彗星見淮南王安心恠之或說王曰先吳軍起時彗星長數尺然尚流血

千里今彗星長竟天天下兵當大起王心以為上無子天下有變諸侯並爭愈益治攻戰具遂謀反

黃帝

占曰彗星出見本類星長可二三尺其炎如氣黃白孛

孛然名孛星見則天下兵起臣謀其主必有亡國期不

出三年 黃帝占曰彗星出見本類星長可一丈其炎

頭散下垂狀如毛拂名曰拂星見則天下亂兵大起強

臣有謀有走主其君失地近一年中三年遠五年黃
帝占曰彗星出見可二丈至三丈形如竹木枝條名曰
掃星三丈已上至十丈名曰彗星彗掃同形長短有差
殃災如一見則掃除凶穢必有滅國臣弑其君大兵起
國易政無道之君當之期三年中五年遠九年石氏
曰掃星者逆氣之所致也枝條長短如彗星之形出居
二十八宿及中外官三日七日或三十日或五十日常
不滅彗字出而即滅掃除凶穢除故布新故言掃星

董仲舒曰孛星者彗星之屬也 偏指曰彗芒氣四出

曰孛孛者孛孛然也謂之孛者言其暗昧不明之貌也

一說云孛即彗也彗星所赦為孛春秋言星孛者皆

彗赦也

按史記曰齊景公三十二年彗星見景公坐柏寢歎曰堂堂誰有此乎羣臣皆泣晏子笑公怒

晏子曰臣笑羣臣諛甚景公曰彗星出東北當齊分野寡人以憂晏子曰君高臺深池賦歛如弗得刑罰恐弗勝孛星將出彗星何懼乎公曰可禳否晏子曰使神可祝而來亦可禳而去也百姓苦怨以萬數而君令一人禳之安能勝衆口乎推此言則孛之為災踰於彗也

劉向鴻範傳曰孛星者非

孛星惡氣之所生也內不有大亂則外有大兵其所以

孛孛曖曖者亂之象也不明之表又參然孛焉兵之類也故聖人名曰孛孛者猶有所妨蔽有所傷害也 荆州占曰彗星其象如竹彗樹木枝條長短無常 黃帝占曰彗星出行犯守外舍當先知逆順入宿深淺去之遠近久速觀其五色察其動靜及以喜怒揚變色皆為殃咎守之去速災輕守之久災重各隨所在之宿命其國以占吉凶 黃帝占曰彗孛所干歷百日以上期三年百五十日以上期五年二百日以上期七年 黃帝

占曰彗星出見其國大人亡見一旬期三月十日見三十日將當之期三年見五十日相當之期五年見七十日人主當之期七年若九年災必應 春秋緯曰諸彗內官皆為內謀曝骨將將死尸滿谿血流千里出外宿不加內官禍小起 巫咸占曰彗星入列宿中外者各以其所部舍官名為其事所之者為其謀其下之國皆受其禍以所守之舍為其期以五氣相賊者為其決

海中占曰彗長五尺以至一丈期三月若十月一丈以

至三丈期三年三丈以至五丈期五年五丈以至十丈
期七年十丈以上期九年 荊州占曰彗星見久災深

大其短淺為災小 黃帝占曰彗星者所以除舊布新

掃滅凶穢其象若竹彗樹木枝條長大而見則災深期

遠短小而見則災淺期近皆為兵飢水喪亡國之殃

按班

固天文志始皇之時十五年間彗星四見久者八十日
長或竟天後秦遂以兵內蕪六國外攘四夷死人如亂

麻

韋昭洞紀曰洛書兵鈴勢曰彗星出野骨捐 春

秋演孔圖曰彗星出則國樞蹶演孔圖曰彗星東出長

八丈天下更政春秋文曜鉤曰彗星孛填街塞路九州粉擊庶人為主 春秋運斗樞曰彗星見後曲象旗則王者伐枉逆 春秋運斗樞曰星之孛臣威孳兵粉擊滅國謀 春秋保乾圖曰星孛脩強圉黜臣所欲又曰星孛兵變 石氏曰彗星出而長名曰白旗喪氣也當視旗之所指所掃衝破之下必有兵喪其國滅亡大人受殃各以衝互為期前互為近期衝破為中期後互為遠期皆不過五七九灾必應 石氏曰掃出狀如上

烏赤色此謂有憂黑者羣臣有賊掃所在之下主亡國
石氏曰掃出狀如小木長三丈其本有黑二三丈其
本有赤見居四維此謂為謀其歲兵發 石氏曰掃出
狀如直竹長二三丈其尾銳白色此謂天下喪天子死
亡國朝不慶諸侯亡 石氏曰掃出狀如直竹長二三
丈赤色尾銳此謂出急令兵戰以見諸侯不德 石氏
曰掃出諸侯誅皆在其國受殃指亦然 石氏曰蓬掃
出見者飢有兵亡地四方蓬掃出其狀如太白蓬長三

丈指樂掃見兵起大亂葉掃見者禾稼就蒲掃見兵起
於境上軍戰不勝杵掃出大將起反人主凶竹掃見
為兵 甘氏曰彗第見則女主有用事者其本為主人
甘氏曰彗掃水之精出則不過一年天下水及有飢星
所在宿其邦尤甚 甘氏曰彗星春夏出為飢水秋冬
出為人主自將兵若大喪又曰冬春見為小凶夏秋為
大凶 甘氏曰彗星其枝條長為兵為喪短為水為飢
其見一旬期三月 京房曰彗星出為飢兵臣下失中

和故出彗掃除之

按韋昭洞紀曰漢安帝三年彗星見四年勃海解卑磨懷反掠遼東三縣

地平原賊起攻官寺長吏西羌匈奴侵邊又旱也

劉向鴻範傳曰彗星者天所

以去無道而建德也

按春秋左氏傳曰昭公二十六年齊有彗星齊侯使禳之晏子

曰無益也祇取誣焉天道不諂不貳其命若之何禳之且天之彗也以除穢也君無穢德又何禳焉若德之穢禳之何損乃止

郝萌曰彗星短為飢為兵向下為土功所見之邦當

之 荊州占曰彗星昏見其國受兵一日必亡國滅軍

不然必有死主

按晏子曰春秋曰景公謂晏子曰寡人聞彗星出其所向之國當之今彗星向

吾國我是以悲晏子曰君穿池欲深廣為臺欲高大誅戮如仇讐又將出彗星寧可拒乎公乃填陂池滅臺榭

薄賦歛緩刑罰三十七日彗星亡矣韋昭洞紀曰周貞定王七年彗星見八年貞定王崩周元王二年彗星見其年魯哀公卒幽明錄曰晉太元末長星見孝武心惡之夜在華林園中飲酒因舉杯屬星曰長星勸爾一杯酒自古亦何時有萬歲天子耶帝亦尋崩也

荆州占彗星出必有反者兵大起其國亂亡一日不出一歲天下大水其邦尤甚 荆州

占曰彗星見則敵國兵起得人者勝

按尉繚子曰昔楚將軍城父子公子

心與齊人未合戰其日夜彗星出柄在齊柄之所在勝不可擊子心曰彗星何衝以彗闕者周知而列之明日與齊人戰大破之 玉歷曰彗星出見是謂天地相靡其分受兵

必有亡國若有死主期不出三年

按韋昭洞紀曰周赧王十年十二年十九年彗

星見後秦取周之
地彗星之應也

巫咸占曰彗星有出者皆是五星

之象以其所出宿以命五行所屬之象出於木宿歲星
之象出於火宿熒惑之象出於土宿填星之象出於金
星太白之象出於水宿辰星之象見於二十八宿中外
官變色揚芒怒而與五星合闕此皆大兵之衝破國之
殃臣凌其君下不伏上天下不順故致此灾審以五色
察之决知存亡之事 海中占曰凡彗有色白黑為男
主赤黃為女主皆為人君女主死之之殃 河圖曰蒼

彗主滅不義少陽之精司徒之類蒼龍七宿之域有起
反若恣虐為害主失春政者以出時衝為期昏主君之
敗也大人滅 春秋緯曰蒼彗水精出見而生芒主逆
陽失天常則日蝕明消此星出期三年五侯破天子若
兵 春秋緯合誠圖曰蒼彗破神明 河圖曰黑彗主
涿州太陰之精玄武七宿之域有謀反若恣虐為害主
失冬政者期如上占禍應之入天子之宿主滅諸侯位
五伯謀 春秋緯曰彗水精賊起則水決江河期二年

其出赤世以水害亡水害者以類發難也近四遠八以
其禍行 河圖曰白彗主斬強少陰之精大司馬之類
白如上占禍應之 春秋緯曰白彗金精如鋒及長四
丈見則將軍逆期二年兵作 春秋合誠圖曰白彗主
臣權一曰專權 河圖曰赤彗主滅五卿太陽之精也
朱鳥七宿之域有謀反若恣虐為害主失夏政者期如
上占皆類名之 河圖曰赤彗火精如火耀長七尺賊
起強圖恣虐期三年 春秋合誠圖曰赤彗滅五卿

河圖曰黃彗主女亂皆土精斗七星之域以張四方八卦之內司空之類有謀反若恣虐為害者期如上占

春秋緯曰黃彗如正見

一本云如重雲

則主女害妃嬪有以色

擢上奪於后妃期一年彗星孛見于四方黃帝占曰

彗星出東方諸侯有起霸者若有兵飢

按韋昭洞紀曰漢武元狩三年

春有星孛於東方匈奴入右北平定襄然掠數千人後元二年七月有星孛於東方冬匈奴入朔方然掠人民

吳志曰嘉禾五年十月彗星見東方都陽賊彭旦等為亂晉朝雜事曰武帝太康二年九月彗星見東方十一

月鮮卑磨懷反河圖曰彗星出東方河逆決將相代主掠遼東三縣地

有與天子並治者

按古洪範天文星辰變占魯哀公十三年冬十一月有星孛於東方其後

楚滅陳國田氏墓齊六卿分晉也

易坤靈圖曰彗星自東方出蒼萌動

功 春秋緯曰彗星出東方爭明光見金代蒼北皆天

子之異大小之類各應其邦春秋感精符曰星孛於東

方言陰奪陽臣代主以兵相滅以勢相乘天下變易帝

位久空人人傲倖布衣縱橫禍未定息主滅亂起陰動

爭明之異也

按韋昭洞紀曰漢武建元六年八月有星孛於東方長竟天門後越王邪攻南越趙

王恢擊之未至越人殺邪

春秋運期授曰蒼帝亡也大

闕亂彗東出

春秋保乾圖曰彗星出東君臣爭明 春秋緯曰星

弗於東方將軍謀主主兵去代主治理天子之權 巫

咸曰彗星出東方其下發兵與天子爭人主亡 京房

曰星孛於東則骨肉欲篡近北邊國入于西則兵大起

蠻貊戰經東西方民病不救之則致日蝕既下謀 荆

州占曰彗星出東方將軍有謀人主者 黃帝占曰彗

星出北方將軍有謀欲代其主若臣行不順而致

洪範天文

星辰變占曰漢武建元六年六月有星孛於北方及淮南王安反服誅 易坤靈圖曰彗星

自北方出色黑動功

春秋緯曰彗掃星出北方諸

侯起霸 郝萌曰彗星出北方長八九丈名勉功勉功出

天下更致 石氏曰掃在北狀如雞聖人受兵強國發

兵諸侯爭權人主凶 黃帝占曰彗掃第出西方天下

有兵夷狄大勝中國大敗

按宋書天文志曰晉成帝咸和四年七月星孛於西北二

十三日減十二月郭默殺江州刺史劉楨荆
州刺史陶侃討默明年斬之石勒又始僭號

易坤靈

圖曰彗星自西方出白萌動功 春秋運斗樞曰彗星

出西方如鉤長可四丈名曰天攬 晉書曰彗星出西

方長可二三丈名曰天槍受之者其國方有土功 洪
範天文星辰變占曰漢宣帝地節元年正月有星孛於
西方去太白二丈所占曰太白為大將軍彗孛加之掃
滅象也明年大將軍霍光薨後二年光家夷滅 荊州
占曰彗星出西方命曰天棊 黃帝占曰彗掃星出南
方天下大亂無有君上兵飢並起 易坤靈圖曰彗星
自南方出赤萌動功 石氏曰彗星出東南其本類星
末類彗長可二三丈至一丈名曰天槍受之者其國內

亂兵起宮中王者憂之 甘氏曰彗星出東南方狀第
長一丈所受之者其國有喪內亂 甘氏曰彗掃東東
南國大人死七十日主當之五十日相當之四十日將
當之 荊州占曰彗星出東南長二丈以上為其國內
亂 春秋運斗樞曰彗星出東北名曰天棓 石氏曰
彗星出東北其本類星末類彗長可四五尺若一丈名
曰天撓受之者其國有戮死者大臣貴人當之 甘氏
曰掃星見東北名曰天棓受之者其國君有戮 石氏

曰彗星出西北本類星末類彗長可四五尺至一丈名曰天棊受之者大亂兵大起若女主有憂有大水其年民飢 巫咸曰彗星出西北如鉤長可四五丈名曰天攬受之者國內亂 荊州占曰彗掃出西北其本類星

末類彗長三丈以上其內亂

按魏志曰母丘儉為鎮東都督曰與楊州刺史文欽

善正元二年正月有彗星數十丈西北竟天起於吳楚之分儉欽喜以為己祥遂矯太后詔罪狀大將軍司馬

景王移諸郎國降兵大反

石氏曰彗星出西南本類星末類彗長

可二三丈名曰掃星受之者其國兵大起將相有死者

邦易政人主有憂

按韋昭洞紀曰漢景二年有星孛於西南四月壬午太后薨氏崩也

石氏曰掃出西南有本類星末彗長三丈以上其國

有土功

春秋緯曰彗星出中央正在人上

一本長命四丈也

曰天罰受者國有喪

石氏曰彗星出中央正在人上

其本類星末類彗星長可五六尺至一丈名曰天戈天

下兵也人主亡受者其國有大喪人民飢亡凡五彗出

見皆期三年中五年遠七年九年

荊州占曰彗星

見中央正出人上長三四丈以上其國內喪 魏氏圖

曰彗星東去西南指海中兵起欲敗中國也西去而東指羌胡入界煞人灾也南去而北指者天下人死半邦也北去而南指天下水沒城郭地陷崩也 魏氏圖曰東行西指越兵大起得所出國民排患也 魏氏圖曰南行西北指者其國大豐孝經內紀曰彗星東北行西南指者所出國中大要為亂也 魏氏圖曰西行東指者國塞外兵入國為大起兵 魏氏圖曰北行南指者其國中禍大起也 魏氏圖曰西行東南指者國中大

惡為亂 孝經雌雄圖曰彗星四出

按圖文橫如十字而四尾並散也

滿天下有知之士就高而居之也無知之士流為糞土

耕於山脅 彗星圖曰蒺藜星出天下大旱赤地五百

里無生草也 兩彗俱見彗有芒角五 孝經雌雄圖

曰兩彗俱見者天子歲再赦

一曰北向指者一歲再赦也

孝經內

記曰二彗星起南指者所出國大血流道洛書摘亡辟

曰三彗俱起海內少男子 春秋元命包曰彗星四出

滅六王 洛書摘亡辟曰彗星四出滅六王 荊州占

曰彗星四出竟天人主亡徵也 洛書曰五彗並出太

白入午白虹貫能主省尚可治 春秋緯曰五彗俱出

聖君起則獲麟執授紀 巫咸曰五彗俱出侯稱王天

下大亂兵起四方諸侯同謀人主亡除舊布新掃去

凶殃更立明君天下大昌期百八十日遠一年又曰五

彗出東方人主坐之聖人起亦然荊州占曰五彗俱出

天下兵起人主亡 春秋緯曰彗星五芒禍之極効之

徵也 春秋考異郵曰彗星之芒臨京都主以賞罰不

行偏任見犯

唐開元占經卷八十八

欽定四庫全書

唐開元占經卷八十九

唐瞿曇悉達撰

彗星占中

彗星晝見一

彗星圖曰彗星晝見所臨國下當為河天地合矣

按孫盛晉

陽秋曰惠帝大安元年夏四月彗星晝見不行其占也

彗星犯日二

孝經雌雄圖曰彗在日傍子欲殺父又曰四彗在日中
君有德天下歡以大豐盛也 石氏曰彗星守日候精
星也天下大亂兵革大起羣臣並謀天子亡期不出三
年 玉歷曰彗星貫日臣殺君子謀父貫日過事必然
期百日遠一年

彗星犯月三

河圖聖洽符曰彗星入月中必有破軍死將兵大起其
國以火災此三年大飢 洛書曰彗星入月中必有亡

軍亡將起以北國 海中占曰彗星入月中兵大起有
臣欲弑其君者十二年大飢 海中占曰彗星入月中
星無光不出其年亡國星出亡國復立 河圖曰彗星

角襲月臣弑其主

按戰國策曰唐睢謂秦王曰
專諸判王僚彗星襲月也

甘氏

曰彗星在月首必有大兵起者將軍死有失地君不出
二年 文曜鉤曰彗星之行掩月五星拂而過兵大起
必有戰有死將臣專政逐其主王者憂期三年 孝經
雌雄圖曰彗星在月中臣當坐君子死憂 齊伯曰彗

星貫月天下有大兵臣殺主若女主當之期一年遠二年

彗星犯五星四

黃帝占曰彗星出入太白長可五六丈金火之兵大用
大戰流血天下更政期三年遠五年 石氏曰掃星出
守五星侯稱皇天下起兵諸侯並謀天子亡

彗星犯東方七宿五

角彗孛犯角

甘氏曰彗孛干犯兩角間白者軍起不戰邦有大喪其

色赤戰芒所指必有破軍侵城期七十日或三年

按宋書天

文志曰魏甘露二年十一月彗星見角色白景元元年高貴卿公帥左右兵襲晉文王未及戰為成濟所害哀

帝興寧元年八月有星孛於角亢入天市三年正月皇后王氏崩二月哀帝崩三月慕容攻洛陽沈勁等戰死

石氏曰彗星出角天下大亂更政易王暴兵起必有戰

期三年中五年遠九年 陳卓曰彗星出角天子起兵

王廷穀大貴大疾疫 韓楊曰彗星出角后黨恣外連

禍 郝萌曰彗星出入角長可七八尺天下更政金火

之兵大用

亢彗孛犯亢

黃帝占曰彗孛星干犯亢國有昏亂釋舊布新易帝王
近期百八十日遠一年 甘氏曰彗第干犯亢中國不
安兵起政亂期一年 巫咸曰彗星出亢天下大飢其

國有兵人民多疫人相食期不出三年

按檀道鸞晉陽
秋曰孝武帝寧

康二年三月丙戌彗星出氐亢移及角軫翼張長十丈
東北指十一月天門逆賊攻郡殺吏民威遠將軍桓
石虔破羌賊姚萇於墊江三年正月丁未八月大赦天
下太元二年九月苻堅屠涼州虜刺史張天錫車騎冲

發三州史民移諸
流民悉居淮南也
荊州占曰彗星出亢天子失德天下

大飢有水兵疫

按宋書天文志曰魏景元三年十一月壬寅彗星見亢色白長五丈積四十五

日滅鍾會鄧艾伐蜀克之會艾反亂

陳卓曰彗星出亢為兵喪五穀不成

氐彗字犯氐

黃帝占曰彗孛干犯氐大臣殺其主兵大起更政近期

百六十遠期一年 陳卓曰彗孛干犯氐大赦天子失

德羅大貴 甘氏曰彗第干入氐中後宮有亂暴兵不

出百八十日遠三年 黃帝占曰彗星入氐房間綺綺

索索如冬木無葉從風而倚此星出為兵戎此歲星之變見不過一年 石氏曰彗星出氐天子不安有大赦中宮有亂暴兵起不出百八十日 石氏曰彗星出氐中天下大赦其滅民大疾惡糴大貴有兵事 石氏曰彗星起氐中天子不安宮移徙必失座 按宋書天文志曰宋少帝景初元年十月戊午有星孛于氐北尾長三四丈西北指貫攝提向大角東行日長六七尺十餘日滅明年五月徐羨之等廢帝

房彗孛犯房

甘氏曰彗第干犯房王國有兵起民飢骨肉相殘也

石氏曰第從房出天子紕行為無道諸侯舉兵守國

甘氏曰彗星出房大兵起水旱不調人多飢死去其宅

田一曰人相食期不出二年 郝萌曰彗星出房中國

大飢有兵擅興在道旁矛戟在野戰鬪不止蜚蜚橫下

陳卓曰彗星出房山崩 尚書中侯曰星孛房四邦

灾 按春秋魯昭公十年冬有星孛于大辰魯大夫申須
曰諸侯其有大灾乎明年五月宋衛陳鄭四國同日

火考異郵曰彗孛貫房王室大亂 荊州占曰彗孛星
於房赤帝之後受命人主凶有亡國 郝萌曰彗星如
房後百二十日火 甄曜度曰彗星守房天下有喪戴
麻鏘鏘天子亡不出其年 春秋緯演孔圖曰彗星守
房心天下有喪一曰天子亡一曰大人憂 詩緯含神
務曰蒼之亡彗出房 石氏曰彗孛干犯鉤鈐王宮大
亂不出三年

心彗孛犯心

堯圖變書曰大辰有孛主謀見煞必有立王相射伐春

秋緯曰星第干大辰國分為二大夫制君 春秋緯潛

潭巴曰有星第干大辰受命之君大振兵旅爭于野

春秋緯演孔圖曰彗星賊起入大辰天帝謀易王 春

秋感精符曰孛星賊起光入大辰者將有陰謀以邪犯

正與天子爭勢居位者大臣謀主兩王並立周分之異

也 易緯曰彗星守大辰東方之疫天子亡 春秋緯

曰彗星守大辰天子哭

按宋書天文志曰魏青龍四年十月甲申有孛星干大辰長三

文景初元年
皇后毛氏崩

黃帝占曰彗星出心兵起宮中劒戟交鋒

大臣相疑有戮死者近七日中七十日遠八十日春

秋運斗樞曰孛星守心主位分大臣謀上天子凶 玄

冥曰彗星出心若守之天子有喪德令不出蝗虫大起

民大飢流亡去其鄉期一年遠二年

司馬彪天文志曰
孝桓延禧四年五

月辛酉客去營室稍順行生芒長五尺所至
心一轉為彗為大表後年鄧后以憂死也

宋書天文

志曰安帝義熙十一年五月甲申彗星出天市掃帝位

在房心北房心宋之分野占曰得彗柄者興除舊布新

宋興之象也 玄冥曰彗星出心若守之大水五穀不成 石氏曰彗孛犯守心宮鐘大鳴劍戟交橫大臣相疑天下兵起心變期急近期七日中期七十日遠期百八十日

尾彗孛犯尾

合誠圖曰掃出尾箕間狀如蓬首掃臣專權 陳卓曰彗星出尾宿兵革罷弊天下大飢君子賣衣小人賣妻歲多大風大雨 海中占曰彗星出入尾后相貴臣誅

兵起宮門宮人走出國易政期一年中二年遠三年

洪按

範天文志曰星辰變占曰漢文后七年九月星孛于西方其本直尾箕末指虛危長丈餘及天漢十六日不見

後三年吳楚七國同時皆反也

石氏曰彗星孛于犯守尾后有以珠玉

簪珥惑天子者諸讒大起后相貴臣誅宮人出走兵起宮門多土功近期百八十日遠一年

箕彗孛犯箕

石氏曰彗星出箕夷狄為亂大兵起天下大旱糴貴十倍人多餓死死大半期二年海中占曰彗星出箕

天下大飢大臣有見棄捐者 河圖聖洽符曰彗星出
入箕天下大旱穀貴人民飢死十有五死 聖洽符曰
彗星守箕東夷下濕與水軍將為亂

彗孛犯北方七宿六

斗彗孛犯南斗

甘氏曰彗孛干犯南斗度其國必亂兵大起期一年

陳卓曰彗弟長干犯南斗王者病疾臣謀其君子謀其
父弟謀其兄是謂無理諸侯不通天下易政大亂兵起

期百八十日遠不出一年

按宋書天文志曰晉武帝太康八年九月星孛于南斗長

數十丈十餘日滅太康末武帝耽晏遊多病疾是月乙酉帝崩永平元年賈后誅楊駿及其黨與皆夷三族楊太后亦殺是年又誅汝南王亮大保衛曜楚王偉王室兵喪之應也春秋緯曰彗星出南

斗天下有勢皆謀 孝經雌雄圖曰彗星出南斗中宮

中失火燒寶 甘氏曰彗星出南斗大臣謀反兵水並

起天下亂將軍有戰若流血星若滅斗其國主亡若星

明反臣受殃近三年中五年遠七年 荊州占曰彗星

出南斗天下皆謀上 石氏曰彗星第於斗房亦帝之

後受令人主凶有亡國

牛彗孛犯牛

甘氏曰彗茀干犯牽牛吳越兵自立三年而滅

陳卓云期一年

遠三年

彗要占曰彗茀干犯牽牛中國起兵 荊州占曰

彗入天鼓有兵 荊州占曰彗星干牽牛須女之間狀

如彗其本有四星壘然此星出為兵此辰星變見不過

一年兵大起國飢 海中占曰彗星出牽牛四夷兵起

邊境為亂來侵中國人主有憂期一年中二年遠三年

司馬彪天文志曰孝章建初元年八月庚寅彗出天市長二尺所行稍入牽牛三度積四十日稍滅彗出天市為外軍牽牛為吳越是時蠻夷陳縱等反安夷長宋延為西羌所殺校尉馬防行車騎將軍征西羌又阜陵王延子男魴謀反大逆天道得不誅廢為侯

陳卓曰彗星牽牛改元易號之

象也

按班固天文志曰哀帝建平二年彗出牽牛七十餘日傳曰彗所以掃舊布新也牽牛日月五星所

從起歷數之元三正之始彗而出之政更之象也而出久者其事大也其六月甲子夏賀良等建言當改元易號增漏刻詔書改建平二年為大初元德元年號曰陳聖劉太平皇帝漏刻以百二十為度八月丁巳悉復蠲除之賀良及黨與皆伏誅流放其後卒有王莽篡國之禍宋書天文志曰晉惠帝永康元年十二月彗出牽牛之西指天市明年趙王纂位改元尋為大兵所滅也又曰多兵穽貴牛大死春

秋聖洽符曰彗星牽牛北夷驕奢治將為亂

須女彗孛犯須女

石氏曰彗第干犯須女隣國有以奇女來侍省 石氏

曰彗孛干犯須女其邦兵起女為亂若妾遷為后王者

無信大亂期不出三年退女所親天下安寧矣 感精

符曰彗星出須女其國大兵起女主為亂王者惡之將

軍戮死若以戰亡期不出三年

按檀道鸞晉陽秋曰孝武寧康二年正月丁巳

有星孛于女虛芒長四尺西南指太元二年五月符堅遣偽帥毛當符寇逼西涼州虜刺史西平公張天錫

送于堅所冬十月車騎桓冲遣諮議參軍淮南太守劉
波沈舟淮泗乘虛設計以送涼州又發三州官吏移救
流民悉置淮南也 巫咸曰彗星出須女之間辰星之變也 陳

卓曰彗星出須女帝以女亡有水災羅大貴益貴

虛彗星孛犯虛

郝萌曰彗星干犯虛中有哭泣之事牆垣無立者有井
田之法改制之事 荊州占曰彗星干犯虛宗廟起兵
陳卓曰彗星孛犯干虛其國野戰流血星芒角所指
兵所積也 甘氏曰彗星孛干虛其國亡 帝覽嬉曰

彗星出虛兵大起天子自將兵於野大戰流血其芒炎
所指國必亡期三年遠五年 春秋緯運斗樞曰彗孛
出虛危間大司空行誅 郝萌曰彗星出虛危間天下
亂 荊州占曰彗星出虛危間司空行謀 陳卓曰彗

星出虛大水期三年 玉歷曰彗星出虛危之間其國

有叛臣兵大起將軍出行國易政期三年

按宋書天文志曰晉惠帝

永康二年四月彗星見齊分是時齊王問起兵討趙王倫倫滅問擁兵不朝專權淫奢明年誅死宋武永初三
年二月辛巳有星孛于虛危繞河津掃河鼓占曰為兵
喪五月宮車晏駕明年遣軍救青司二月太后蕭氏崩

危彗孛犯危

石氏曰彗孛干犯危其國有叛者兵起大將軍出 甘氏曰彗星出危天下亂司空行誅有土功之事兵大起期二年 玄冥曰彗星出危其國有叛臣兵大起將軍出國易政若大水民飢期三年 陳卓曰彗星出孛於危帝必易有大水糴大貴

營室彗犯室

甘氏曰彗孛干犯營室先起兵者弱不可以戰戰必亡

地主將必亡去之近期百八十日遠二年 聖洽符曰

彗星出營室有大水

按韋昭洞紀曰漢成建始元年正月有星孛于營室三年秋闕內大

水也聖洽符曰彗星出營室天下兵大起 齊伯曰彗星

出室壁間兵大起若有大喪有亡國死王期不出三年

按司馬天文志曰孝順帝永和六年二月丁巳彗星見東方長六七尺色青白西南指營室及墳墓星後四年

孝順帝崩宋天文志曰宋武永初三年十一月戊午有星孛于室壁少帝景平元年正月乙卯有星孛于東壁

南白色二丈餘拂天苑二十日滅黃帝占曰彗星出營

室天下亂易政

按宋書天文志曰魏嘉平三年十一月癸亥有星孛于營室積九十日正元二

年二月李豐豐弟宛州刺史翼后父光祿大夫張緝等謀亂皆伏誅皇后亦廢其九月帝廢為齊王高貴鄉

公代立也

郝萌曰以五色占其吉凶

黃帝占曰李見營

室中後宮且有亂一曰有德令

按洪範天文志星辰變占曰漢成建始元年正

月有星孛于營室青色長六七丈廣尺餘占曰營室為後宮懷妊之宮彗星加之將害人性其後許皇后坐祝詛廢趙飛鸞為皇后弟為昭儀害兩皇子卒皆伏辜家屬徙於遼西也

郝萌曰諸李氣在

營室民人疾疫死亡

河圖曰彗起芒臨營室以告咎

荊州占曰彗星干守營室則五校三軍動兵不戰牛

馬驚不出七十日

石氏曰彗星犯守營室先起兵者

不可以戰必亡地期三年遠六年

壁彗星孛犯東壁

石氏曰彗第干犯東壁其國起兵火災廟堂四門流血
天下隔 荊州占曰彗孛干犯東壁文章者死 郝萌
曰諸孛氣入東壁人民疾疫多死亡 巫咸曰彗星出
東壁王者起兵毀壞宗廟四門伏兵流血滂滂人民惶
惶莫知其殃近期一年中期三年遠五年 荊州占曰
彗星出東壁大水民流于道

彗孛犯西方七宿七

奎彗孛犯奎

甘氏曰彗星干犯奎度其國君出戰大飢人相食國無
繼嗣近期一年遠三年 石氏曰彗星出西北舉兵伐
中國其下食石千錢天下大水 海中占曰彗星出奎
有大兵起四夷來伐中國郡君出戰天下大飢有水災
期三年遠五年 河圖曰杵彗出貫奎庫兵悉出禍在
強侯外夷相應首謀期三年遠九年

按宋書天文志曰
晉惠帝元康五年

四月有星孛于奎到軒轅太微經三台大陵占曰奎為魯又為庫兵軒轅為後宮太微天子廷三台為三公大陵有積尸死喪之事明年武庫火西羌反後五年司空張華遇禍賈后廢死魯公賈謫誅又明年趙王倫篡位於是三公興兵討倫士民戰死十餘萬人也

荊州占曰彗星守奎魯國兵起宋書天文志曰晉成帝咸康二年正月辛巳彗星夕見西方在奎占曰為兵喪奎又邊兵四年石虎伐慕容晃不克既退晃追擊之又破麻秋時晃稱藩邊兵之應也

婁彗孛犯婁

石氏曰彗孛干犯婁國有大兵四時絕祠遠不出三年

陳卓曰彗孛干犯婁臣奪君位近期一年遠三年
海中占曰彗星出婁國有大兵四時絕祠有亡國先旱
後水人民飢死五穀大貴糴無價期一年遠二年 陳
卓曰彗星出婁六畜疫

胃彗孛犯胃

石氏曰彗第干犯胃五穀不成倉庫空虛 甘氏曰彗
干犯胃其國兵起不出三年 黃帝占曰彗星出胃昴
之間狀如竹竿而細此星出為兵戎此太白之變見不

過一年其國兵起若有喪 巫咸曰彗星出胃大臣為
亂天下兵起五穀不升人民飢餓京都困倉悉皆空虛
期三年中五年遠七年 郝萌曰彗星出胃昂之間狀
如竹彗為兵灾若火 荊州占曰彗星出胃昂之間大
國起兵

昂彗孛犯昂

甘氏曰彗星孛干犯昴度大臣亂國兵大驚期一年
春秋運斗樞曰彗星孛出昴畢間大邦起王 甘氏曰

彗星出見昂有喪 巫咸曰彗星出昂大臣為亂君弱

臣強邊兵大起天子憂之人民驚恐國有憂主期一年

中二年遠三年

按司馬彪天文志曰光武建武十五年正月丁未彗星見昂稍西北行入營室

犯離宮三月乙未至東壁滅見四十九日彗星為兵又除穢昂為胡兵至十一月定襄都尉陰承反太守隨誅

之盧芳從匈奴入居高柳至十六年十月芳降上璽綬一曰昂為獄事是時大司徒歐陽歙以事繫獄踰歲死離

宮妃后之所居彗星犯之是除宮也是時郭后已疏至十七年十月遂廢為中山太后也 郝萌曰彗

星出昂色赤邊有大兵謀反天子有憂 郝萌曰彗星

出昂赦

畢彗孛犯畢

荊州占曰彗孛犯畢必有死丈夫數萬人 甘氏曰彗

孛干犯畢邊兵寇中國亡近期一年遠期五年 荊州

占曰彗星干犯畢邊軍大戰 陳卓曰彗孛干犯畢中

原流血 黃帝占曰彗星畢觜之間小而長狀如直竿

上有星壘壘然此星出為兵戎此鎮星之變見不過一

年兵起宮中女主有殃 石氏曰彗星出畢大兵起馬

貴其星內指邊兵勝其星落地兵破 巫咸曰彗星出

畢突厥為寇亂中國邊兵戰有流血若有亡主死將期
三年遠五年黃帝占曰彗孛守畢柄候邑益土守畢
口中邦相為亂邑易政邑君大臣當之黃帝占曰彗
星出附耳庶雄起陪臣反司馬彪天文志曰孝獻建安
五年十月辛亥有星孛于大梁冀州分也時袁紹在冀
州其年十一月紹軍為曹公所破七年夏紹死後公遂
取冀州

彗星孛犯觜

石氏曰彗星干犯觜觿國兵起天下動擾期一年遠三年
荆州占曰彗星干犯觜觿其國兵起破亡 甘氏
曰彗星出觜觿其國兵起有失地死王天下民流大臣
出戰下有亡國期三年遠五年 石氏曰彗星出觜觿
穀大貴大臣出戰期七月 劉向洪範傳曰彗星見觜
觿必有破國亂君伏死其辜者 按漢書天文志曰景帝
中二年三月丁酉彗
星夜見西北色白長丈在觜觿旦去並小十五日不見
觜觿梁也是時梁王恐懼伏斧鉞謝罪然後得免也

參彗孛犯參

石氏曰彗孛干犯參其國邊兵大敗其君亡近期一年

遠期三年 黃帝占曰彗星出參伐天子更政 甘氏

曰彗星出參大兵蔽地大臣謀反后有憂天子躬甲冑

鉞大用兵馬馳道弓弩恒張期三年遠五年

漢書五行志曰元延

三年星孛及攝提大角從參至辰並亡世嗣王莽篡也 荊州占曰彗出於參東井

之間上柱煞伐長吏 黃帝占曰彗星與熒惑並見於

參天子更政一曰天子受政 石氏曰彗星見參伐大

國君不吉 郝萌曰彗第星流入參若出參其年兵起

按班固天文志曰元帝初元五年四月彗星出西北赤黃白色長八尺所後數日長丈餘東北指參分後二年餘西羗反左將軍奉世擊平之

彗孛犯南方七宿

東井彗孛犯東井

黃帝占曰彗孛干犯東井大使出野有兩軍相當不出

三年 甘氏曰彗星干犯東井其國兵起

按車類秦書曰符堅九年

四月有客星出尾箕長十餘丈狀如彗而未曲或名蚩尤旗拂于東井自夏及冬不滅太史令張益孟光奏彗起尾箕尾箕燕分而拂東井東井秦分燕首北亂於秦東胡鮮卑歷世稱燕今慕容暉父子兄弟亡處而不報

聖朝職爵鱗次執權乘勢馳輪躍馬貴榮莫與為二宜少抑退除其渠帥夫蝮蛇螫手壯夫解腕玄象告兆事應無差堅不納後慕荆州占曰彗星干犯東井則大臣容氏遂稱王於燕地

謀其國用兵期百八十日 石氏曰彗星出東井其國

兵大起車騎滿野有軍大戰將軍有死者若大臣有誅

期三年中六年遠九年 郝萌占曰掃出東井上莖煞

漸漸長上白下赤狀如矛刃此為兵災乃太白之變

陳卓曰彗星出東井民人讒言國政崩壞天下大水

陳卓曰彗在東井大人死見三十日兵將當之見五十

日相當之時見七十日主當之

鬼彗孛犯輿鬼

石氏曰彗孛干犯輿鬼大兵橫行近期一年遠三年天子小赦除咎 石氏曰彗星出輿鬼國有大兵戰死於野骸骨滿坑人民疾病死者縱橫期不出三年王者以赦除咎則灾消矣 石氏曰彗星出輿鬼名曰喪樓皆以赦解應之 荊州占曰彗星出輿鬼有喪 陳卓曰彗星出輿鬼人民疾病死者半棺木貴

柳彗孛犯柳

甘氏曰彗孛干犯柳國誅大臣兵喪並發外臣凌主天

下傾危期三年

按班固天文志曰孝武建元三年三月有星孛于注張歷太微干紫宮至于天

潢其後濟東膠西江都王皆坐法荆州占曰彗星干犯

削黜自殺淮南衡山謀反而誅之柳周國當之期九十日 黃帝占曰彗星出張注之間

狀如吹之火且燃此星出有兵災此熒惑之變見一過

一年兵起國亡 巫咸曰彗星出柳國誅大臣兵喪並

起強臣凌主天下傾危其國大旱民以飢死期三年遠

五年 陳卓曰彗星出柳有兵臣凌主大旱穀貴 詩

緯含神務曰彗星守味南夷將為亂

按司馬彪天文志曰孝明永平八年

六月壬午長星出柳張三十七度犯軒轅刺天船大陵微氣至上階凡五十六日去柳周也是歲受雨水郡十

四傷稼

七星彗星犯七星

甘氏曰彗星干犯七星邦有亂臣國主不定兵起宮殿

貴臣戮大臣相疑近期七十日遠期百八十日 荊州

占曰彗星干犯七星其國有大兵不出百八十日 河

圖曰彗孛出七星天子與聖叶期三年聖人出 甘氏

曰彗星出七星國有叛臣人主不安兵起宮中大臣戮

死貴人當誅若有水灾民飢期不出三年遠三年

按宋書天

志曰魏齊王正始六年八月戊午彗星見七星長二丈色白進至張積二十三日滅七年十月癸亥又見軫長

一丈積一百五十六日滅九年二月又見昂長六尺色青白芒西南指七月又見翼長三尺進至軫積四十二

日滅嘉平元年司馬懿誅曹爽兄弟及其黨與皆夷三族京師嚴兵實始前魏三年誅楚王彪又襲王陵於淮

南淮南東楚也幽魏諸王于鄴

郝萌曰掃星出七星張之間狀如布從

風如靡此星為兵戎熒惑之變也 郝萌曰彗星出七

星張之間狀如欵之火且燃為兵熒惑之變也

張彗孛犯張

甘氏曰彗孛干犯張其國外內用兵王徙宮天下半亡

石氏曰彗星出張天下大亂有兵王者徙宮殿天下

半亡人民惶惶无有聊生見五十日期三年七十七日期

五年百日期七年百五十日期九年必發

按司馬彪天文志曰王莽

地皇三年十一月有星孛于張東南行五日不見後一年正月光武起兵舂陵會下鄉新市賊張卬王常及更始兵亦至俱攻破南陽斬莽前隊大夫甄阜屬正梁丘賜等然其士衆數萬人更始立為天子至河南都洛陽

西入長安敗死光武興於河北復都洛陽陳卓曰彗星出張大旱穀石三千粟尤甚

宋天文志曰魏明帝景初二年八月彗孛星見張長三尺逆西行三十一日滅占曰為兵喪張周分野洛邑惡之其十月斬公孫淵明年正月明帝崩晉武帝太康二年八月有星又孛于張四年三月戊申孛於西南四年三月癸丑齊王攸薨四月戊寅任城王陵薨五月己亥瑯琊王佃薨十一月戊午新都王該薨

翼彗孛犯翼

黃帝占曰彗星干翼國用兵大臣有憂遠期百八十日

甘氏曰彗孛干犯翼其國有大兵芒所指降伏近期

三年遠期七年 孝經鉤命決曰天子失禮則孛於翼

黃帝占曰彗星出翼軫之間天下皆謀上國有大喪

人主死亡必有大兵期不出三年 春秋運斗樞曰孛

掃出翼軫之間天下有勢皆謀 石氏曰彗星出翼其

國有喪以水為飢民多流亡視芒所指必有降伏期三

年遠六年

按宋書天文志曰魏明帝太和六年十一月丙寅有星孛於翼近太微上將星明年孫權

有遼東之敗權又自向合肥新城遣全琮攻六安皆不克而去又明年諸葛亮入秦川據渭南司馬懿距之孫權遣步騭諸葛瑾等臨江夏江口孫韶張承等向廣陵淮陰權以大衆圍新城以應亮於是帝自東征權及諸將乃退太和六年十二月陳王桓薨青龍元年夏北海王薨薨三年正月太后郭氏崩也

郝萌曰

彗弗出翼軫之間狀如布從風而靡為兵災熒惑之變也石氏曰彗星守翼大臣謀反五穀貴甘氏曰彗

孛干犯軫兵喪並起期百八十日遠一年


按宋書天文志曰晉武帝

太始四年正月丙戌彗星見軫青白色二月皇太后王氏崩十月吳將施續寇江夏或寇襄陽後將軍田章荊州刺史胡烈等破却之司馬彪天文志曰孝獻建安十二年十月辛卯有星孛于鶉首荊州分野時荊州牧劉

表專據荊州益州從事周羣以為荊州牧將死而失主
明年秋表卒子琮自代曹公將攻荊州琮懼舉軍詣公
也降

彗孛犯軫

巫咸曰彗星出軫天子崩兵喪並起滿宮門車馬無主
民無定君期三年中五年遠九年王者以赦除咎則消
矣



唐開元占經卷八十九

欽定四庫全書

子部
唐開元占經卷九十

詳校官中書_臣李采

靈臺郎_臣倪廷梅覆勘

總校官編修_臣王燕緒

校對官中書_臣王慶長

謄錄監生_臣錢雋選

欽定四庫全書

唐開元占經卷九十

彗星占下

彗孛犯石氏中官一

彗孛犯攝提一

石氏曰彗星出攝提天下亂帝自將兵於野兵起宮中

王者有憂期不出二年 郝萌曰彗星出攝提主迷惑

唐

瞿曇悉達撰

羣下爭起

彗孛犯大角二

齊伯曰彗孛出大角傍可六七丈天下大亂兵大起國
易政期三年中五年遠七年 按洪範五行傳曰秦始
皇帝三十七年五月彗星出於大角其長七尺以東北
入于女御有一大星與星闕於宮中三月 五月彗星
盡大星乃亡始皇以六月乙丑死于沙丘及西南行至
咸陽乃禍諸子女官及九卿皆死以兵天下大亂起而

攻秦遂亡又曰五月彗星出於鶉首十五餘日漢三年
十月有彗星出於大角旬餘乃入是時項籍為楚王霸
主諸侯天下歸心於漢楚將滅故彗除位也 郝萌曰
彗星出入角可七八丈天下更政 鈞命決曰天子失
仁則彗守大角 黃帝曰彗星犯守大角大兵起國不
安天子失御有亡國更政令 雒書說微示曰彗星貫
坐亂起 荊州曰彗星孛大角人主亡

彗孛犯梗河三

海中占曰彗孛干犯梗河天子慎邊防亂中國 陳卓
曰彗孛干犯梗河北兵為敗 巫咸曰彗星出梗河四
夷兵為敗中國有邊患若守之王者誅四夷期三年

彗孛犯招搖四

陳卓曰彗孛干犯招搖邊兵大動期一年 石氏曰彗

星出招搖突厥入寇守之勝 黃帝攻胡星孛招搖天官

書曰漢兵伐大宛星孛招搖也 石氏曰彗星守招搖犯北主期出三年

班固天文志曰漢孝武大初中星孛于招搖其後漢

兵擊大宛斬其王

彗孛犯玄戈五

陳卓曰彗孛干犯玄戈主戰單于大敗期二年 玉厯

曰彗星出玄戈北方兵起單于大敗其國破亡期一年

遠三年

彗星犯天槍六

甘氏曰彗星出天槍王者脩四夷防捍邊境若有驚恐
人民憂 陳卓曰彗星守天槍鉞鉞大用誅殺不當多

梟首之民

彗孛犯天棓七

聖洽符曰彗星出天棓兵大起五仗用國有憂期二年
陳卓曰彗星守天棓兵四起

彗孛犯女牀八

石氏曰彗孛干犯女牀貴人暴誅期百八十日 齊伯
曰彗星犯女牀貴人有憂若有暴誅者一曰貴女有罪
者期百八十日遠一年

彗星犯七公九

甄曜度曰彗星出七公忠言者凶議人下獄政令不行王者信讒邪臣在側其國憂敗

彗孛犯貫索十

春秋緯曰彗星出貫索大臣憂有反者海中占曰彗星出貫索必有反臣殺君若有大赦期百日遠一年孝經內記曰彗星在天獄諸侯作禍

彗孛犯紀星十一

陳卓曰彗星犯紀星天下國相擊若地震按班固天文志曰孝武建元三年四月星孛天紀四年十月而地震宋書天文志曰青龍四年十一月己亥彗星犯天紀景初元年六月地震 玄冥占曰彗星出天紀大臣相戮兵起宮中主后憂若出走期二年

彗星犯織女十二

陳卓曰彗孛干犯織女后族為亂貴女有誅者期三年 文曜鉤曰彗星出織女后黨為亂貴女有誅者若有

女變期百八十日 按班固天文志曰孝武建元三年
四月有孛星于天紀至織女其後陳皇后廢 甘氏曰
彗星出見織女有降主 運斗樞曰彗星出織女女主
之黨反

彗孛犯天市十三

石氏曰彗孛犯天市所犯者誅 巫咸曰彗星出天市
豪傑內外俱起執令者死大臣有誅期三年 司馬彪
天文志曰孝獻初平四年十月孛星出兩角間東北行

入天市中而滅占曰彗除天市將徙帝將易都是時上在長安後二年東遷明年七月至洛陽其八月曹公迎上都許何法盛中興書曰哀帝興寧元年八月有星孛于亢入天市後有龍相誅寶之亂車頻秦書符堅建元八年五月遣少弟陽平公融鎮鄴停灞東苟太后以融少子憂甚比發三出送之垂半夜竊往內外莫知太史令魏述夜奏天市南門內有后妃移動之像堅檢而知之驚曰天道與人何其不遠遂重星占

彗孛犯帝座十四

石氏曰彗孛犯帝座民人大亂宮朝徙治大臣不臣期三年帝覽嬉曰彗星出帝座大臣為亂守之不去貴人有變更政令

彗孛犯候星十五

石氏曰彗孛干犯候星兵起帝宮大國易治期三年若出候星天下亂宗人相敗若相攻士卒有急行不出其年

彗孛犯宦者十六

玉歷曰彗孛出宦者左右貴人有罪若刑於市者不出
二年按宋書天文志曰魏青龍四年十一月己亥彗
星犯宦者劉向五紀論曰宦者在天市為中外有兵景
初元年九月吳將朱然圍江夏荊州刺史胡質擊走之
二年正月討公孫淵

彗孛犯斗星十七

聖洽符曰彗星出斗星天下亂民不從市外不用事人

民飢

彗孛犯宗正十八

甘氏曰彗星出宗正宗主有事若左右親族有死者期百八十日遠一年

彗孛犯宗人十九

齊伯曰彗星出宗人王者同姓臣罪若親族有謀者期不出一年

彗孛犯宗星二十

甄曜度曰彗星出宗星主恩薄以親為疎簡宗廟則彗出之 春秋緯曰彗星出宗星族人反

彗孛犯東西咸二十一

文曜鉤曰彗星出東咸女主淫佚自恣宮門不禁若貴女有憂

彗孛犯天江二十二

巫咸曰彗星出天江天下大水舟船用五穀不登其歲人相食期三年 陳卓曰彗孛干歷天江大兵攻王國

王者以赦除之則國豐平

彗孛犯建星二十三

陳卓曰彗孛干犯建星王失道忠言者誅賢士逃亡

黃帝曰彗星出建星道路不通多盜賊子攻父弟攻兄
守之則有大兵將軍出行期一年遠三年

彗孛犯天弁二十四

帝覽嬉曰彗孛出天弁寶玉大貴若糶貴五倍萬物不
興其國飢 郝萌曰彗星入若守天弁者皆為囚徒起

兵

彗孛犯河鼓二十五

郝萌曰彗星入河鼓且有兵 黃帝曰彗星出河鼓天下兵起大將出謀旗鼓立若守之有死將守中星大將死守旁兩星小將死期一年中三年遠五年 春秋緯曰彗星出河鼓鼓鳴武士發天子賦

彗孛犯離珠二十六

石氏曰彗孛犯離珠後宮為亂若宮人有誅守之陽為

大旱陰為大水五穀不登人民飢

彗孛犯匏瓜二十七

石氏曰彗星干犯匏瓜政亂近臣相譖宮有戮死者王者以赦除咎 玉歷曰彗星出匏瓜人主因食瓜而亡若果中有藥害其君若食官憂 玉歷曰彗星守匏瓜魚鹽貴十倍果物不成

彗孛犯天津二十八

石氏曰彗星犯天津賊斷王道 郝萌曰彗星干犯入

漢中有亡國當其野者變之 甘氏曰彗星出天津關
津不通若關吏有憂若守之天下大亂津河隔塞有旱
災期三年 雒書摘亡辟曰彗星見漢中亡君之戒

何法盛中興書曰安帝隆安四年十一月星孛于貫索
及天市中天津其時元顯輔政刑罰不中故掃貫索發
徭無度故掃天市建士失節故掃天津天津關通萬川
利關梁也天市貨財帛周百姓也貫索平察刑獄無枉
濫也而元顯皆反之天若曰掃除穢惡令改革也顯不

悛遂致覆滅

彗孛犯王良二十九

運斗樞曰彗星出王良好遊馳奉車反 齊伯曰彗星
出王良兵馬大動車騎行天下有急馬多死一曰水道
不通津開塞期二年遠三年 宋書天文志曰魏陳留
王咸熙二年五月彗星見王良丈餘色白東南指積十
二日滅占曰王良天子御駟彗星掃之禪伐之表除舊
布新之象白色為喪王良東壁宿又并州之分野八月

晉王薨十二月帝遜位於晉

彗孛犯螣蛇三十

陳卓曰彗孛干犯螣蛇水道不通天下隔期二年 聖
洽符曰彗星出螣蛇以水雨為害大水出萬物不成民
人飢一曰水虫為敗

彗孛犯閣道三十一

陳卓曰彗星干犯閣道王者居正殿不私行則災自消
甄曜度曰彗星出閣道天下津不通兵大起御道有

伏兵欲謀其主王者宜備之

彗孛犯附路三十二

陳卓曰彗孛干犯附路道不通天下半隔期一年 海
中占曰彗孛出附路天下大飢車騎滿野道中縱橫人
主臨兵期三年

彗孛犯天將軍三十三

玄冥占曰彗星出天將軍兵大起將軍出旗陳立若守
之大將死若有誅期不出二年

彗孛犯大陵三十四

文曜鉤曰彗星出大陵國有大喪有土功墳陵之事若
守之天子崩明審期不出三年遠五年 春秋緯曰彗
星出大陵天子以不慈見犯復出之將反

彗孛犯天船三十五

春秋緯曰彗星出舟星外夷侵 巫咸曰彗星出天船
天下大水舟船用事若外夷來侵水兵起期一年 按
司馬彪天文志曰漢孝明帝永平三年六月丁卯彗星

出天船北長二尺所稍北行至亢南百三十五日去是
歲伊雒水溢到津城門壞伊橋郡七縣三十二皆大水
宋書天文志曰晉穆帝升平二年五月丁亥彗星出
天船在胃宿中四年五月天下皆大水

彗孛犯五車三十六

石氏曰彗孛干犯五車兵滿野天下半傾百姓徙居去
其土期三年 黃帝曰彗星出五車兵大起車騎行有
攻戰糴大貴人民飢彗若守之先起兵者昌後起兵者

亡期三年 春秋緯曰彗星出五車谷霜兵起主賣位
天下賢名起

彗孛犯卷舌三十七

帝覽嬉曰彗孛出卷舌人主用讒言誅忠臣貴人有戮
死者一曰民多言訟不出年 春秋緯曰彗星出卷舌
主以聽讒之主遇殺大臣反 按宋書天文志曰宋文
帝元嘉二十八年五月彗星見卷舌入太微過帝座犯
上相拂屏出端門滅翼軫三十年天子巫蠱呪咀事覺

遂以殺逆害朝臣孝建元年荆江二州反皆夷滅卷古
呪咀之象彗之所起是其應也

彗孛犯天關三十八

石氏曰彗星出天關兵大起道路不通民多盜賊必有
關塞之事人主有憂 玄冥占曰彗星出天關而守之
天下道絕國多盜賊關梁不通人主有憂期一年遠二
年

彗孛犯南北河戒三十九

海中占曰彗星出南河蠻越兵起邊域有憂若關吏有
罪者 郝萌曰彗星出天高廟臣反名侯王起 海中
占曰彗星守南河為大旱出北河夷為亂來侵中國若
守胡軍敗又曰守北河為大水期不出三年石氏曰朝
鮮之伐星拂河戒 按班固天文志曰漢武帝元封中
星孛于河戒其後漢兵擊拔朝鮮北為樂浪玄菟郡
石氏曰彗孛于兩戒間天子出走大臣親盛亡王者以
赦咎

彗孛犯五諸侯四十

石氏曰彗孛干犯五諸侯王室大亂兵起天子宮廟不祀春秋緯曰彗星出五諸侯州牧反九州合謀玉歷曰彗星出五諸侯執政臣有謀若有被戮者貴人當之人主有憂期一年遠二年司馬彪天文志曰孝獻建安十七年十二月有星孛于五諸侯時周羣以為西方專據土地者皆將失亡是時益州劉璋據益州漢中太守張魯別據漢中韓遂據涼州宋建別據罕明年冬

曹公遣偏將擊涼州十九年獲宋建韓遂逃于羌中病死
其年秋璋失益州二十年秋公攻漢中魯降也

彗孛犯積水四十一

石氏曰彗星干犯積水兵起宮門宗廟毀絕大臣有憂
彗孛犯積薪四十二

石氏曰彗孛干犯積薪有亂臣在宗廟

彗孛犯水位四十三

石氏曰彗孛干犯水位水道不通伏兵在水中以水為

害 甘氏曰彗孛出水位天下以水為憂有兵起五穀不成人民飢

彗孛犯軒轅四十四

石氏曰彗孛干犯軒轅近臣誅滅宗族王者以赦除咎
黃帝曰彗孛出軒轅皇后有憂若失勢宮人不安人
主有憂 春秋緯曰彗星入軒轅后族亂 運斗樞曰
彗孛出軒轅女妃為寇 石氏曰彗星犯軒轅天下大
亂易王以五色占期 黃帝占曰彗星入軒轅若守之

天下大亂易王宮門當閉若女主死期三年遠五年

彗孛犯少微四十五

石氏曰彗孛干犯少微白衣聚者凶術士不顯智者逃亡期三年 巫咸曰彗星出少微多能臣有死者若上臣有罪一曰法令臣有誅者 石氏曰彗星出少微士夫起 宋書天文志曰魏黃初六年十月乙未有星孛于少微歷軒轅占曰孛彗為喪除舊布新之象是時帝軍廣陵辛丑親御甲冑跨馬觀兵明年五月文帝崩

彗孛犯太微四十六

春秋緯曰彗星第干太微天子亂 陳卓曰彗孛干入
太微帝宗后族為亂亡社稷一曰所犯者亡 聖洽符
曰彗星入太微庭中臣謀主有兵起王者災社稷其國
憂期百八十日遠一年 郝萌曰赤黃星狀如帚入太
微婦女喜心出太微天子賜諸侯美女 春秋緯曰彗
若出犯執法御史反 運斗樞曰彗孛出若干太微法
式滅帝死於野 春秋緯曰彗星出而第太微天下亂

不過三五必易政以色占期 按司馬彪天文志曰孝
靈光和五年七月彗星出下台東南行入太微至太子
幸臣二十餘日而消彗入太微天下易主至中平六年
宮車晏駕孝獻建安二十三年三月彗孛晨見東方二十
餘日夕出西方犯歷五車東井五諸侯文昌軒轅后妃
太微鋒炎指帝座二十五年正月魏文帝受禪 玉歷
曰彗星出太微帝宗后族為亂大臣弑主謀在親戚御
臣王者有憂期三年 石氏曰彗星出太微中宮火大

起殺人 甘氏曰彗星出太微天庭中有立王若徙王
孝經雌雄圖曰彗在太微君害臣 玉歷曰彗星犯
太微天子妃后去宮人不安女主有憂

彗孛犯黃帝座四十七

石氏曰彗孛如粉絮入太微犯守帝座國有崩喪大臣
立主

石氏曰王者
以赦除咎

天下大亂兵起若犯守四帝輔臣有

誅執政者亡期三年 石氏曰彗星如粉絮犯座星兵
喪並起又大彗第干犯座星王者亡子孫不昌王者循

孝於天奉宗廟郊祠則災除 雒書說徵示曰彗指帝座四旁中大亂 荊州占曰星銳如劍正赤直抵座星天子驚兵一曰驚火又云星如苴蒂抵座星旁左右諸臣兵起內亂 陳卓曰星狀如帚正赤抵聖座星婦女兵

彗孛犯屏星四十八

玉歷曰彗星出屏星守衛臣有謀若有罪執法者當之
彗孛犯郎位四十九

陳卓曰彗孛干犯郎位臣失勢 運斗樞曰彗出郎位
郎官謀反天子因官郎位所主之官也 王歷曰彗星
出郎位左右守衛為亂若有謀者人主驚備之

彗孛犯郎將五十

王歷曰彗星出郎將大將有誅若有罪一曰大臣為亂
有兵起

彗孛犯常陳五十一

甘氏曰彗星出常陳若守之王者出誅左右守衛之臣

一曰若防守者有死期三年

彗孛犯三台五十二

黃帝曰彗星出上台司命有兵起大臣三公有自出者
若守之貴臣有誅上公有憂期百八十日遠一年黃
帝曰彗星出中台司中奸臣有謀兵大起貴人當出彗
若守之中公有罪若憂誅黃帝曰彗出下台司祿近
臣有罪若憂死若守之貴人多死下公當之將憂皆不
出三年運斗樞曰彗星出三台西相反出其中太尉

反出其東大司馬反 按韋昭洞紀曰漢靈帝光和五年彗星出下台十月太尉許盛免孝經內記曰彗在三台臣害君者也 宋書天文志曰晉惠帝大安二年三月彗見東方指三公占曰兵喪之象三台為三公是年冬成都河間攻洛陽三年正月東海王越長沙王反張方討之 雌雄圖曰彗星出三台有陰謀姦軌起一曰宮中火起一曰臣害君禍大起

彗孛犯相星五十三

陳卓曰彗孛干犯相星輔相憂不出一年天下變更其令民多移徙

彗孛犯天牢五十四

雌雄圖曰彗星出天牢諸侯作禍相賊害 荊州曰彗星出天牢豪傑中外俱起 齊伯曰彗星出天牢貴人多下獄者若大臣有戮其國亡期百八十日遠一年

彗孛犯文昌五十五

石氏曰彗孛干犯文昌則輔臣受殃近期三年遠期六

年 運斗樞曰彗星出文昌上將星大將軍反出次將
左右將軍反出貴相大司徒反出司祿得勢大臣反出
司命天下有權者俱反亂尤甚 合誠圖曰彗星出而第
文昌天下大亂政以色占 甘氏曰彗星出文昌若守
之天下大亂大臣受殃國易政各以五色占之近期一
年中二年遠三年

彗孛犯北斗五十六

春秋緯曰星第于北斗中有雄聖人受命天子 潛潭

巴曰星孛于北斗璇璣更授天子起走 感精符曰孛
賊入北斗中者大國結謀伐天子運樞行之主號諸侯
爭權天下皆叛兵合禍構逆亂之變也 辨終備曰彗入
北斗帝宮空 按韋昭洞紀曰頃王六年彗星入北斗
晉趙有率諸侯平周亂立王子班是為匡王 宋書天
文志曰義熙十四年五月壬子孛于北斗魁中癸亥彗
星出太微西柄起上相星下芒衡長至十餘丈進掃北
斗紫微中占曰彗出太微社稷亡天下易王入北斗紫

徽帝宮空一日得聖主是年宋高祖受宋公恭帝元熙
元年七月晉帝遜位高祖入宮也 感精符曰星孛入
北斗兵大起將有以外制權以兵為政者 坤靈圖曰
至德之萌黃星孛于北斗必以戊巳日其光無芒丈行
無武動事莫之敢拒者 漢含孳曰彗星入北斗強國
亂 鈞命決曰周襄王不能事其母孛入北斗 甘氏
曰彗涕流入北斗魁中得名人其不入北斗魁失名人
劉向鴻範傳曰孛入于北斗邪亂之臣將弑其君

京房曰星孛入北斗則大臣叛 郝萌曰赤星入北斗
中國使匈奴 荊州占曰彗星流入北斗諸侯戮春夏
期三月秋冬期一年 黃帝曰彗星出北斗長可八九
尺天下更政易王暴兵卒起期百八十日若一年 春
秋緯曰彗星出北斗九星中九卿反如星所主其政毀
其人亂 潛潭巴曰彗星芒出於斗樞天子亡諸侯息
雌雄圖曰彗星出北斗中宮中火起 石氏曰彗星
出北斗長可七八尺天下大亂國易政有兵起若大戰

先起者亡中起者殃後起者昌期三年中五年遠九年
海中占曰彗星出北斗大臣謀反兵大起 按洪範
天文星象變占曰漢武建元三年三月有星孛于王良
芒自太微經斗內至天漢其後濟東王膠東王江都王
皆坐法削黜自殺衡山王反誅之也 又曰若入斗魁
大臣誅死若被誅三日乃占春夏期三年秋冬期一年
魏氏圖曰彗星出于斗中者宮中失火燒寶 郝萌
曰彗星出北斗長可八九丈名曰勉功勉功出天下更

政 荊州占曰彗星出北斗之中反而入北斗後將得
大臣其出北斗亡大臣其一西一東害於侯公一南一
北戒在金革一八一羸天下不寧 荊州曰彗星出北
斗中聖人受命 玄冥曰彗星出北斗必有大戰流血
若入斗中得名將不入斗中失名將各以其日占知其
國不出其年 石氏曰孛星出北斗中大臣諸侯有受
地 巫咸曰彗星見於北斗天下更政 洪範傳曰孛
星見北斗中大臣諸侯有受誅者一曰受兵 甄曜度

曰彗孛貫北斗下有傑王五軍合 演孔圖曰彗星守
北斗天帝謀易王 春秋緯曰彗星守北斗強國發諸
侯爭天下 海中占彗孛守北斗強國發兵大臣爭權
大人有憂國易其主天下不寧守之三日以上大臣當
誅期三年遠五年 按左氏傳魯文公十四年七月星
孛于北斗周内史叔服曰不出七年宋齊晉之君皆將
死亂後十六年宋襄夫人使昭公田孟諸而弑之十八
年齊閻職反邴歆弑懿公於申池宣公二年晉趙穿弑

靈公於桃園杜預曰史服但言事不論其占服虔曰晉趙盾弑靈公也春秋緯曰彗星出輔星庶雄起陪臣反

彗孛犯紫宮五十七

感精符曰星孛于紫宮將有陰謀反者陳卓曰星孛于紫宮有大變拔兵上殿一曰入紫微宮有奇令春秋緯曰彗星入紫微宮其國謀反黃帝曰彗星出而抵紫宮天下大亂荊州曰彗星出長垣邊反又曰

彗星而抵紫宮天下易政 按司馬彪天文志曰孝靈
中平五年二月彗星出奎逆行入紫微宮復出六十餘
日乃消占曰天下易主明年宮車晏駕 韋昭洞紀曰
漢黃龍元年三月有星孛于王良閣道入紫宮十二月
宣帝崩 黃帝占曰彗星出紫宮入守之宮中有兵天
下大亂有亡主國易政以五色占其國期百八十日中
一年遠三年 按司馬彪天文志曰孝獻建安九年十
月有星孛于東井輿鬼入軒轅太微十一年正月有星

李北斗首入斗中尾貫紫宮及北辰占曰彗掃太微紫
宮人主易位其後魏文帝受禪 司馬彪天文志曰孝
章建初元年十二月戊寅彗星出婁二度長八九尺稍
入紫微宮中百六十日消滅大人忌後四年六月癸丑
明德皇后崩 荊州曰彗星守天子宮有亂天子之政
者

彗孛犯北極鉤陳五十八

春秋緯曰彗星入樞名人起相誅天下亂 玄冥曰彗

星出北辰臣謀弑主有自立王彗耀刺下為寇害期一
年 春秋緯曰彗星入樞期八年五霸起帝主亡 荆
州曰彗星刺天樞五精之類謀 黃帝曰彗星入守北
辰除舊布新三王立五旗生有端命之應名人起兵天
下大亂君臣相誅期不出百八十日中一年遠三年
石氏曰彗星出鉤陳臣弑其主若入守鉤陳幸臣亂宮
若有誅者期不出一年遠三年

彗孛犯天一太一五十九

黃帝曰彗孛干厯天一則宮門不開王者內不安近臣
亂不出三年

彗星犯石氏外官二

彗孛犯天庫樓一

春秋緯曰彗孛出天庫樓兵動驚主泣血下不聽石
氏曰彗星出庫樓天下兵起車騎滿野庫兵用一曰民
以飢兵起期三年

彗孛犯南門二

王歷曰彗星出南門有兵起兵器用若道路不通

彗孛犯平星三

齊伯曰彗星出平星執法臣憂政令不行國失綱紀
石氏曰彗星平星主以峻法為過海內亂

彗孛犯騎官四

春秋緯曰彗星出騎官英雄起天子憂 甘氏曰彗星
出騎官士卒發用兵騎出若守之將軍若有死者期三
年

彗孛犯積卒五

甄曜度曰彗星出積卒為謀星去疾謀不成若守之主將有憂 春秋緯曰彗星出積卒衛士並為亂禍不成

彗孛犯龜星六

文曜鉤曰彗星出龜星珠玉有出者寶物大貴若守之君臣不和上下乖離

彗孛犯傅說七

春秋緯曰彗星出傅說主以祠非其神失禮為內外所

謀巫祝起天下匿譏在宮中 石氏曰彗星出傳說王者後宮少子孫若守之有絕祀之君

彗孛犯魚星八

春秋緯曰彗星出魚星后黨反 玉歷曰彗星出魚星天下大水海魚出名水溢若守之天下大旱魚行人道不出其年

彗孛犯杵星九

甘氏曰彗星出杵星歲大飢有兵起民以米粟為憂若

金少曰卷之三
絕軍糧

彗孛犯鼈星十

聖洽符曰彗星出鼈星有大水白衣之會若有水令若
守之其國大旱

彗孛犯九坎十一

齊伯曰彗星出九坎有水旱之災出南則大旱出北則
大水

彗孛犯敗臼十二

甄曜度曰彗星出敗白天下有急兵當於米粟之事國有憂期二年

彗孛犯羽林十三

春秋緯曰彗星出羽林軍人謀反 海中占曰彗孛出羽林兵起宮中臣弑其主大人被甲有亡國若守之三十日國破主亡期三年 春秋緯曰彗星出壘城校尉以反軍成

彗孛犯北落十四

玄冥占曰彗星出北落若守之兵起大戰若殺大將人主自將兵於外四夷作亂期三年遠五年

彗孛犯土司空十五

文曜鉤曰彗星出土司空兵大起有土功事若營室一曰大將憂期一年

彗孛犯天倉十六

巫咸曰彗星出天倉兵革大起粟大出天下民飢以粟為憂若有轉輸之事海中占曰彗星出天倉天下粟

出若守之久國無儲糧人民飢期三年

彗孛犯天困十七

巫咸曰彗星出天困倉庫虛空無儲積有出粟天下大饑人民流移期二年

彗孛犯天廩十八

帝覽嬉曰彗星出天廩其國大饑倉粟出廩人飢死其分兵起期不出三年

彗孛犯天苑十九

春秋緯曰彗星入天苑都護反 黃帝曰彗星出天苑
兵大起馬多發牧畜不蕃多有死者一曰禽獸麋鹿多
死按司馬彪天文志曰孝安永初三年十二月乙亥彗
起天苑南東北指長六七丈色倉天苑為外兵起是後
羗兵討賊杜季貢又使烏丸擊鮮卑又使中郎將任尚
護羗校尉馬賢擊虜皆降之

彗孛犯參旗二十

春秋緯曰彗星出天弓暴骨將死死尸滿谿流血千里

石氏曰彗星出參旗天下大亂兵起弓弩用大將出
有變一曰弓弩大貴期三年

彗孛犯玉井二十一

玉歷曰彗星出玉井兵大起強國失地一曰彗守玉井
天下大水河海溢流民多沒死

彗孛犯屏星二十二

甘氏曰彗星出屏星大臣有戮國有憂一曰彗守屏人
民疾疫有移國

彗孛犯厠星二十三

聖洽符曰彗孛出厠大人有憂若厠有謀兵欲害主一
曰彗星入厠天下飢人相食期二年

彗孛犯矢星二十四

齊伯曰彗星出矢星若守之貴人多患腹而死若人民
多死以五色占黃則吉青白疾黑死

彗孛犯軍市二十五

甄曜度曰彗孛出軍市大兵起軍糧絕天下大飢將士

離散兵多死亡期二年

彗孛犯野鷄二十六

海中占曰彗星守野鷄大將死軍市破諸侯相攻有亡國期三年

彗孛犯狼星二十七

黃帝曰彗星出狼星國有急兵名將出行將軍有憂若守之必有千里之行大戰流血死者大半期三年中五年遠七年運斗樞曰彗星出狼弧主以恣侵為過外

夷反

彗孛犯弧星二十八

石氏曰彗星出弧星弓矢大用大兵起其國亂驚人民
不寧多盜賊 按司馬彪天文志曰孝靈光和三年冬
彗星出狼弧東行至于張反去後四年京都發兵擊黃
巾賊

彗孛犯老人星二十九

巫咸曰彗星出老人其色黃王者昌若守之赤彗三芒

人主受殃老者不康

彗孛犯天稷三十

海中占彗星出天稷歲大飢五穀不成人民流亡社稷不安

彗星犯甘氏中官三

彗星犯天理一

春秋緯曰彗星出天理大司空斬將逐天子

彗孛犯策星二

彗孛星近策星王者不宜出宮下有謀亂不過七十日

彗星犯造父三

陳卓曰彗星入造父若守之僕御謀弑主有斬死者兵盡起

彗孛犯臥星四

春秋緯曰彗星出臥星尚書反人星一名臥星也

彗孛犯扶筐五

陳卓曰彗星出扶筐將作反

彗星犯酒旗六

春秋緯曰彗星出酒旗主以酒過為相所害

彗孛犯諸王七

春秋緯曰彗星出諸王星諸侯稱王皇以南吳楚北燕
趙東齊宋西秦晉

彗孛犯恠八

春秋緯曰彗星出司恠主多妖祥僻偽起大臣侯王代
主位

彗星犯天高九

春秋緯曰彗星出天高廟臣反名王起改號

彗孛犯天演十

春秋緯曰彗星出天演但聞之將反

彗孛犯天街十一

運斗樞曰彗星出天街五侯並起天子自理海中占曰彗星出天街內有賊人

彗孛犯甘氏外官四

彗孛犯鉞鎖一

春秋緯曰彗星出斧 淫兵多主以妄誅將鎖之臣反

彗孛犯闕丘二

春秋緯曰彗星出闕丘帝滅

彗孛犯巫咸中外官五

彗孛犯長垣一

甘氏曰彗星出長垣大臣謀反兵起宮中天下有亂亡
國人主有憂期不出二年 春秋緯曰彗星出長垣邊

反

彗孛犯天廡二

陳卓曰彗星出天廡守之天下名廡有失火者若移徙
一曰天下廡車馬有恠 春秋緯曰彗星出廡官法令
違法度數起變臣執主勢

唐開元占經卷九十